

DISSERTATIO INAUGVRALIS MEDICA
DE

TVSSI CONVVLSIVA

Oder:

Vom Stusten

Womit ein allgemeiner Krampf verbunden

QVAM

PRÆSIDE

DN. FRIDERICO HOFFMANNO

ACADEMIÆ ET ORDINIS MEDICORVM SENIORE

PRO GRADV DOCTORIS

LEGITIME IMPETRANDO

Ad d. Decembr. Anni MDCCXXXII.

PVBLCO ERVDITORVM EXAMINI SVBICIT

AVTOR

JO. SAMVEL PITSCH

HERRNSTADIO - SILESIVS.

HALÆ MAGDEBVRGICÆ,

Typis JOH. CHRISTIANI HILLIGERI, Acad. Typogr.

RECEIVED IN THE OFFICE OF THE

1851

COMMUNAL

1851

RECEIVED IN THE OFFICE OF THE

1851

ON THE 18TH OF JANUARY

RECEIVED IN THE OFFICE OF THE

1851

RECEIVED IN THE OFFICE OF THE

1851

RECEIVED IN THE OFFICE OF THE

1851

RECEIVED IN THE OFFICE OF THE

1851

RECEIVED IN THE OFFICE OF THE

Q. B. F. Q. V.

DISSERTATIO INAUGVRALIS
MEDICA

DE

TVSSI CONVVLIVA.

PROOEMIUM.



Vum de tussi conuulsiua aliquid commentari aggrederer, & antiquitus actorum & scriptorum memoriam reuoluere animum subiret, parum absuit quin deterrerer ab instituto, quum illud nomen apud antiquos frustra requirerem. Nouum esse morbum ne cogitare quidem licebat per HIPPOCRATEM nostrum, a quo commemorata gibbositas menti obuersabatur, eaque ante pubertatem ex tussi facta: quam profecto non mediocrem existimare poteram, sed talem omnino, quæ id omne haberet, quod in tussi vehementissima, quæ conuulsiua dici solet, obseruatum est: quoniam spinæ dorsi vertebra- rum, arctissime per tot vincula inter se deligatarum, nexum vitare valuit. Cognoui tandem æ-

tiologicam tussis doctrinam, qualem scholæ a GALENO traditam habuerant, tam superficialem esse, vt cordationibus propioris æui doctoribus minime satis facere potuerit: vnde factum est, vt misso inani intemperierum commento, ad id potius, quid partes solidæ in hoc morbo patiantur, respexerint, sicque veteri quidem rei nouum nomen, naturæ tamen illius conuenientissimum, imposuerint. Quod quum celeberrimos nostri æui medicos adeo non offenderit, vt potius quotidiano vsu familiarissimum iam factum sit: nec mihi verendum fuit ne iustam propterea reprehensionem incurrerem.

§. I.

Tussis, in genere dicendo, est motus thoracis expiratorius intensior, & vt plurimum crebrius per breuissima interualla repetitus, quo aer, copiosius primum haustus, clausoque tantisper larynge detentus, tota deinde vi, sursum truso diaphragmate, musculorumque abdominis, tum vero etiam ceterorum expirationi dicatorum, fibrarumque, quas ipsa bronchia habent, motricium nisu, iterum eliditur.

§. II.

Motus hic, in vniuersum non est præternaturalis, quum sanissimi etiam, quoties lubido est, tussire possint: quod sæpe dedita opera faciunt, qui venam
chirur-

chirurgo secandam præbuerunt. vt sanguinis effluxus concitior reddatur. Nimis autem saepe iniussu nostro idem oboritur, & a necessitate quadam, cui resistere non valemus, imperatur. Atque talis morbosa constitutio ad motus conuulsiuos iure eodem referri meruit, quo omnes reliqui motus, qui ex naturæ instituto voluntatis nostræ moderamini vel integre, vel ex parte, subiecti sunt, quoties inuitis nobis exercentur, ad hanc classem pertinere censentur.

§. III.

Quamquam vero omnis tussis non voluntaria conuulsiuam indolem præ se ferre cognoscitur: nomen tamen conuulsiuæ illi potissimum inhaeret, quæ efferata vehementia diaphragma fursum contractum, in hac systole longiori, aut creberrime repetita, detinet: vnde fit vt pulmones valde compressi in motu suo plurimum inhibeantur, vt laborantes fere suffocentur, faciesque illorum penitus liuida & tumens de sanguinis a capite ad pectus defluxuri stagnatione testimonium cuius inuenti præbeat. Primus, ni fallor, WILLISIVS nomen illud rei apprimè conueniens imposuit: cuius exemplum ET TMVLLERVS, alique clari viri, sequuti sunt. Veteres, rem designaturi, vocabant talem tussim *ἑρπιδόν*, *ferinam*, aut *κοπιῶδν* *de lassantem*: quorsum etiam refero ab iisdem memoratam *πνιγμῶδν*, *suffocatinam*.

§. IV.

Enimvero non solum pulmonum actioni obest hæc spasmodica motus expiratorii affectio; verum etiam ad ventriculum nimis saepe transit vitium. Quippe is contenta sinu suo excutit, vomituque expellit, in

consensum scilicet raptis ipsius neruis, iamque musculos visceri circumdatos conuellentibus, vt sursum violenter exprimant, quicquid intus hæret.

§. V.

Quin tanta est violentia illius conuulsivæ agitationis, vt sæpe in tenerioribus & gracilibus pulmonum vasa disrupta, sanguinique effluxuro viæ amplissimæ paratæ sint: aut sanguis ad caput vehementius pulsus, ibique detentus, narium tunicam perruperit, & hæmorrhagiam induxerit. Visi etiam sunt, quibus vrinæ & aluiarum sæcum inuoluntarius effluxus sub paroxysmo accidit. Aliquando, quod magis mireris, vertebræ dorsalis corpus in medio disruptum fuit: quod notabili exemplo in *Ephemer. Acad. N.C. Cent. I. observ. I.* comprobatum legas.

§. VI.

Præcipue tamen teneræ infantum & puerorum ætati molesta est, & per interualla tantum affligit eorum corpuscula, vt sæpe sanguis sincerus ex pulmonibus reiiciatur, palpebræ insignem in modum inflentur, oculi lacrymas emittant, nares sanguine stillent, crebro sternutent & vehementissime, ac simul hoc motu, & tussis ipsius assiduitate, hernias sibi contrahant: quod quidem in tam teneris corporibus minus mirari decet, quum sæpe etiam adultis, & iam consistentem ætatem adeptis, idem vitium inferre soleat. Quin thoraci etiam malam conformationem illam, quæ gibbositas dicitur, conciliat, quod longæuitati consequendæ, obseruante HIPPOCRATE *Aphorism. Sect. VI. 46.* plurimum obstat.

§. VII.

§. VII.

Non raro epidemium hoc malum per satis longas regiones grassatur; neque optimis remediis, & alio tempore efficacissimis, multum auscultat, donec temporis progressu aeris melior & emendatior constitutio reddatur.

§. VIII.

Quemadmodum tussis mitior vel humida est, vel sicca: ita grauissima hæc convulsiva modo nihil emolitur, aut nihil, quod tanto conatui par sit; modo humida est, quæ mucus ex palato, larynge, aspera arteria & bronchiis, sæpe vna cum pure & sanguine, reicit; vel ex postremis faucibus & œsophago eundem sursum adducit.

§. IX.

Causa tussis primaria est neruorum, vel ipsi pulmonum visceri, vel laryngi, asperæ arteriæ & bronchiis tributorum, tum vero etiam ad partes, ob officii societatem spiritalibus hisce organis proxima affinitate iunctas, pertinentium, aut cum his originis aut complicationis vel propagationis ratione iunctorum, molesta irritatio, ad quam excutiendam & propulsandam natura corporis nostri musculos expirationi dicatos omnes, vna cum lacertosis fibris, quæ contrahendis & ad se inuicem adducendis bronchiorum semicircularibus segmentis tributæ sunt, in celeres vehementesque contractiones, identidem repetendas, impellit.

§. X.

Pro eo autem ac materia irritationem illam adferens vel in pectore potissimum hæret, vel œsophago
ven-

ventriculoue insidere certis signis indicatur, vel hypochondriacis demum visceribus impacta esse cognoscitur, tussis diuersa omnino nomina accipit; adeoque pectoralis, stomachicæ & hypochondriacæ nomina in scholis celebrantur. Priorem etiam idiopathicam censerî, posteriores duas consensuales haberi videas.

§. XI

Et spiritus quidem vias, quas ad pectus, quo ducunt, totas referre licet, ab initio ad finem natura obduxit tunica multis ductibus excretoriis spisse obsita: qui ductus vel arteriarum extremitatibus continuati, ad humectationem & irrigationem perpetuam, fundunt fluidum aliquod blande mucilaginosum; vel a peculiari-
bus glandulis palatinis, tonsillis, iisque quæ epiglottidem & cartilagineum arytænoidem obsident, quæque arteriæ asperæ tunicæ posteriori, magnum spacium, quo annulli cartilaginei cessant, explenti, crebræ interiacent, tamquam a totidem scaturiginibus exoriuntur, & spiritus vocisque vias, perpetuo muci prouentu, lubricas & æquales seruant: quod idem in bronchiis, vsque ad extremum eorum, obseruare licet, etsi de glandulis bronchialibus, quas recentiores auctores paulo studiosius contemplati sunt, incertum sit vtrum ad illius fluidi prouentum institutæ sint, an alium in œconomia vitali vsum præstent. Quoties vero accidit in his ductibus nimium muci secerni, id quidem facili conatu natura expellit, tussimque pectoralem leuiorem hinc fieri obseruamus. Si vero valde tenax illud sit, & acri vellicante indole insuper præditum, & imis bronchiorum recessibus inclusum; aut non tenax quidem, sed nimis
flui-

fluidum instar aquæ existat, vt in altum propulsum identidem retro labatur; grauiori vtique molimine, eodemque crebrius repetito, illud excutiendum est, sicque ad conuulsium modum & gradum tussis ista excedit.

§. XII.

Acris autem & vellicans ille humor vel ab origine sua talis prodit, quando vniuersa humorum massa istiusmodi sordibus scatet; aut quando ad superficiem vel extremos artus antea deposita, medentis imprudentia, aut ægrotantis qualicunque culpa, retro pelluntur, vel naturæ imbecillioris defectu non amplius vegete satis expelluntur. Patet hoc exemplo exanthematum retro-pulsorum, vt scabiei, tineæ capitis, guttæ rosaceæ, vlcerum haud satis consulto studio consolidatorum, rheumaticorum decubituum & podagræ retrocedentium: quæ singula pectus interdum grauius affligere, & seorsim tussis grauiissimas conuulsivas produxisse, multis obseruationibus comprobari facile potest: vel externa causa, ex aere communi hausta, acrem illam qualitatem irritantemque conciliat.

§. XIII.

Inter externas illas causas maxime valet aeris constitutio, quæ non solum quando insolito tempore flantibus austris calida & benigna est, sicque humores blande elicit & expandit, deinde autem mox frigus, idque aquilonare, superinducit, arteriæ asperæ & bronchiorum internam superficiem subito constringendo, cum reliquis catarrhalibus molestiis tussis etiam populariter inducit; verum etiam de singulari quadam plus minus caustica & maligna sui prauitate, inductarum febrium

B

& exan-

& exanthematicorum affectuum crebro & populari pro-
uentu, testimonium perhibet. Atque de eiusmodi epi-
demiis tussibus, satis diris & molestis, legi debet præ ce-
teris quidem HIPPOCRATES *Epidem. VI. Sect. VII.* SEN-
NERTVS *de febribus Lib. IV. cap. 17.* & TH. SYDEN-
HAMVS: addantur quoque quæ ad constitutiones epi-
demicas pertinent laudatissimis actis A. N. C. a celeberrimis viris passim inserta, vt & *historie morborum Wratislaniensium* & *Acta medicor. Berolin. vol. 2. p. 2.*

§. XIV.

Peculiariter notabilis est ille nexus tussis & morbillorum: quippe hi plerumque, vt præcursores, ita comites, habere tussis solent: videsis *Act. N. C. Dec. III. Ann. IV. obs. XI. p. 25.* Quod hoc etiam auctumno vidimus, quo complures infantes & pueri molestissima tussi, plane conuulsiva, per duos fere integros menses, laborauerunt, donec tandem circa medium Nouembris, post variolas satis crebras multisque funestas, morbilli prodierunt, qui non paucos etiam illico corripuerunt, qui modo a variolis liberati fuerant.

§. XV.

Porro ex aere ambiente in spiritus vias attractæ particulae metallicæ, præsertim acidæ minerales, fumique saturnini, illis, qui copiosius vel diutius talia admi-ferunt, grauissimas & eminenter conuulsivas tussis inducere solent. Quod præcipue experiuntur illi metallicolæ, qui argento per plumbum in magnis catinis depurando operam impendunt; tum vero etiam interdum figuli, qui lithargyrio, ad incrustanda vitreo tegmine vasa sua, multum occupantur. Talia autem par-
tim

tim constringendo & occludendo poros agere videntur, ut latex ille subuiscidus, lateribus tracheæ & bronchiorum obliniendis destinatus, effluxu autem suo prohibitus intusque coaceruatus, nervos intertextos moleste premat, hæcque sensatio ad nervos ex communionis & officii focii lege consentientes propagetur: partim immediate eos rodendo & vellicando, postquam eiusmodi particulæ cum saliva, forte etiam per cutis, membranæque pituitariæ & laryngis poros, humorum massæ adiuncti fuerunt: quod inde colligere licet, quoniam saturnina tractantes non tussi solum, verum etiam colica grauissima subinde vexantur, quæ satis sæpe paresin, & omnino contracturas, tandem inducit. Vidi homines, qui aceto destillato vix summis labris degustato illico ferociter tussire coacti sunt, Et quod saturnina summæ tantum cuti sæpius applicata in pulmones vehementer agere possint, vel inprimis docere potest grauissimus auctor HERM. BOERHAAVE, qui *Element. chym. part. III. p. 454.* testatur, quod acetum plumbi, ad cutis nitorem diu multumque adhibitum, in phthisin deducere possit, idque sibi tristissimis sæpe constitisse exemplis.

§. XVI.

CORNELIVS CELSVS, bonus in primis auctor, tussim fere propter faucium exulcerationem molestam esse reliquit. Id vero paulo obscurius dictum, facit ut hæreamus, quo pacto intelligendum sit. Potest enim ita accipi, quod tussis propterea molesta sit, quia exulcerationem, diuturnitate allisionis, faciat, quemadmodum videmus partes externas diuturniore & frequentiore

ad res solidas, aut se ipsas inuicem attritu, intertriginem contrahere: aut sic intelligi, quod exulceratio ab initio præsens causa tussis existat. Deinde ipsa faucium accussatio ambiguos nos reddit, quid CELSVS sibi velit; quum æque laryngem ac pharyngem intelligere liceat. Enimuero quum fauces anginae specierum sedem faciat, neque minus dyspnoeæ, orthopnoeæ & asthmatis subiectum eas habeat: haud difficillimum quidem puto, ut nos ex hoc dubio extricemus: quum sic clarissime intelligamus faucium appellatione illum late usum esse, ut simul complectatur, quæ ad gulæ superiorem partem, & ad spiritus vias, in illo biuio accidunt. Puto autem ipsum potissimum respicere ad illam asperitudinem, quæ hic in malo leuiori, a simplici frigoris constrictiui vitio, exoritur, vnde etiam concurrens raucedo pendet: quæ, quoties aer, illam afferens, aliquid acris & rodentis secum vehit, vnde collisoriis frequens motus concitatur, intertriginosam exulcerationem deinde affert: quæ leuior aut grauior existit, pro eo ac ipse ille aer magis vel minus infectus fuerit. Si grauissime fuerit infectus, aphthodes faucium a summo ad imum exulcerationes conspiciuntur: quod in pestilentibus quibusdam constitutionibus crebro notatum est: de quo argumento hic latissime differere tempus non permittit. Conf. *Eph. A. N. C. Cent. III. obs. I. VIII.* & MARCEL. DONATVM *hist. med. mir. lib. III. cap. I.*

§. XVII.

Fere nos a via distraxit CORN. CELSVS, vna cum suo, quem ibi sequitur, ASCLEPIADE. Redimus itaque ad spiritus vias, de quibus nondum absoluiamus.

In has per aberrationem quamcunque delata peregrina corpora, siue dura fuerint, vt esculentorum particulae, siue fluida, vt guttula potus adsumti, insignem & ferocem tussim illico concitant, vt saepe de vita periclitentur, quibus id accidit. Memini me videre hominem, qui inter sodales vini cyathum exhausturus aliquid narrari audiebat, quod ipsum in cachinnum adducebat, vnde vini portio, retrusa epiglottide, in asperam arteriam incidebat : quod tussim tam violentam tamque assiduam & plane conuulsionibus stipatam afferebat, vt suffocatus forte fuisset, nisi bona eius fortuna homo venas secandi peritus, cum omni apparatu suo, praesens periculo ipsum exemisset. Huiusmodi casus complures annotauit MARC. DONATVS *de med. hist. mir. lib. III. cap. 7.*

§. XVIII.

Si fortuito in tracheam illapsa peregrina duraque corpora tantas turbas faciunt, & naturam ad feroces tussiles exstimulant, quid non metuendum erit fitalia ibi generata sint, suaque praesentia naturam corporis nostri continuo irritent? Enimuero huiusmodi obseruationes apud veteres & recentiores haud paucae exstant. GALENVS certe monumentis litterarum reliquit exemplum viri, qui grandinibus similia tusiendo reiecit : & ALEXAND. TRALLIANVS *Lib. V.* accurate describit historiam viri, qui tussi reiecit verum calculum, non asperum, sed exquisitè laeuem, durum & renitentem, vt in paui-mentum deiectus sonum ederet. Non multo dissimilis est historia, quam PAVLVS AEGINETA *Lib. III. cap. 28.* & 31. refert de quodam, qui post longam & difficilem tussim lapides quatuor aut quinque, vna cum sanguine,
B 3 eiecit,

ieiecit, quorum quisque triplici aculeo, instar tribuli aquatici, præditus fuit. Et PETR. BORELLVS *observat. medicophys. cent. I. 67.* adducit mulierem, quæ per longum tempus calculos paruos, multosque tussi reiecit, variæ figuræ, admodum autem duros. Plura huc pertinentia legi poterunt apud GE. FRANC. de FRANCKENAV, in dissertationibus *de calculis capitis & thoracis. Adde Eph. A. N. C. Cent. X. pag. 371.*

§. XIX.

Alii, iidemque graues auctores, commemorant calculos in tonsillis natos, qui tussis continuæ præbuerunt causam. Legitur talis observatio apud IO. LANGIVM *epist. med. lib. II. 58.* vocat illum calculum gypseum, simillimum illis tophis, qui intra digitorum articulos chiragra laborantibus accrescere ex pituita solent. Plures testes adducit MARC. DONATVS *lib. IV. cap. 30.* Denique etiam leguntur verrucosæ excrescentiæ gutturis summam partem obsedisse & grauisimæ tussis auctores fuisse: de quo videantur apud modo laudatum scriptorem testes idonei, *lib. III. cap. 30. p. m. 247. 248.* Quin vermes quoque in arteria aspera hospitantes, eamque irritantes, tussim produxisse ex SERAPIONE Arabe, quem corruptissime ALSAHARAVIVM vocant, vt & ex IOANN. RHODIO *obs. med. cent. II. 12.* discimus.

§. XX.

Tandem etiam inflammationi pulmonum & pleuræ succedentes suppurationes, indeque ortos abscessus, longæ & difficillimæ tussis causas fuisse, sæpe multumque compertum est. Pleni sunt medicorum libri istiusmodi ægrotorum observationibus. Præ ceteris notatu digna

digna mihi illa videtur, quæ in *Act. N. C. Dec. II. ann. VIII. pag. 245.* de muliere sexagenaria legitur, rupti abscessus purgamenta foetidissima cum tanta tussis violentia emoliente, ac si ipsa cum intestinis enixura esset viscera. Accidit hoc illis maxime ægrotis, ubi abscessus in extrema aliqua pulmonis parte fundo suo hæret, & non nisi exigui bronchiorum ramuli exesi sunt, per quos pus tenacius non sine extremo conatu sursum euehitur: quibus etiam tussis plerumque periodice accidit, ita ut post certa quietis tempora maiori deinceps vehementia motus integrentur. Ceterum huc etiam illi sine dubio referendi sunt, qui pulmonum frustra, vasorumque pulmonarium partes, tussi eiecerunt: quales ægroti apud *TVLPIUM*, aliosque historiæ medicæ scriptores, inveniuntur. Hæc vero de illa tussi, cuius causa in ipsis spiritus viis subsistit, dicta sufficiant.

§. XXI.

Progredimur nunc ad istas tussis conuulsivæ causas, quæ longius remotæ & extra spiritus vias sunt positæ. In primis hic reus agitur stomachus, quoniam sæpe tam adulti, quam tenerior ætas, liberrimis respirationis organis, inferius circa scrobiculi cordis regionem se vellicari, & ad tussim irritari sentiunt, quo casu sæpe viscida, aliquando assumpta omnia, diutius protracta tussi, reiciuntur. Confirmant suspicionem coniuncta symptomata, ventriculi laborem indicantia, ut appetitus prostratus, indigestio, sensus in ventriculo grauatiuus. Atque hic affectus raro solus est, quin adiuncta habeat catarrhalia quædam signa: unde aliqui a catarrhali decubitu in postremarum faucium tunica, per œsophagum potissimum

potissimum continuata, orificium ventriculi sinistrum, ipsique proximas glandulas dorsales, simul intumescere, nervosque paris vagi, œsophagum ibi circumplexos, irritari, hos vero ad pulmones, diaphragma & laryngem abeuntes ramos in consensum trahere, existimant: alii profundius etiam & in ipso duodeno causam irritantem latitare autumant. Accedit quod febribus intermittentibus laborantes, aliquando ante paroxysmum satis ferociter tussunt, toto reliquo tempore satis ab hac concussione immunes. Vidi virum tertiana exquisita laborantem, qui, quamdiu horror febrilis durabat, immani tussi vexabatur: hoc superato, per totum æstus tempus, ut & per totum *αἴματος* spacium, plane a tussi immunis degebat: ipsa deinde tussi eadem proportionem de crescente, qua febris per idonea medicamenta detrahebatur: unde satis clare elucet, quod huius tussis causa cum ipsius febris sede ac fomite satis arcte cohæserit.

§. XXII.

Præter ventriculum & duodenum tussis satis gravis causam fouent remotiores partes abdominis. Nam qui hepatis scirrhis confirmatis laborant, quod suis signis coniicitur, satis sæpe vehementi tussi, per vices interquiescente & reuertente, vexantur. Quemadmodum etiam hydropicis accidunt tusses haud læti euentus præfagæ, sic docente HIPPOCRATE *Secl. VII. aph. 35.* Quin, hoc eodem auctore *Epid. II. Secl. IV.* consensus datur inter pectus & testes, ita ut tusses aliquando diuturnæ cessent superueniente testis tumore, vicissim vero testis tumor, exorta tussi leuetur: quod recenti obseruatione confirmatur *Eph. A. N. C. Cent. III. obs. 83.*

§. XXIII.

§. XXIII.

Neque vero rarum est tusses inter se ita complicari, vt vix satis cognosci possit, quod nomen maiori iure imponendum sit. Nam, in epidemiis præcipue constitutionibus, nihil obstat, quo minus primæ simul viæ & spiritalia organa lædantur, quin hypochondriaca viscera tangantur: quemadmodum tertianæ etiam visæ sunt pleuritico ichemate ingruentes, aliæque ictericam defecationem secum ferentes.

§. XXIV.

Tusses autem tam graues & convulsiuæ non idem præsagium habere possunt. Infantibus multis funestæ sunt illæ, quæ epidemice grassantur: tantoque sunt grauiiores, si simul dentitionis negotium concurrat, quo frequentius est multis tunc veras & plenas convulsiones concurrere. Extra hunc casum propterea etiam extimescendæ sunt, quod hernias inducere valent, aut gibbos facere: quod iam supra attigimus. Adultioribus, etsi non omnino ab indicato metu liberis, magis extimescendæ sunt hæmoptyses, a quibus facilem pronamque in phthisin esse viam nimis notum est.

§. XXV.

Ceterum convulsiuæ tusses omnes peiores sunt mitioribus, eæque, quæ in eodem genere siccæ sunt, humidis. Omnium difficillimæ sunt hypochondriacæ, & ex pectoralibus illæ, quarum causa difficilior potest corrigi aut expelli; vt sunt abscessus interni, calculi in arteria aspera & bronchiis hærentes. Quæ a retropulsis efflorescentiis cutaneis ortum traxerunt, haud adeo difficulter curantur, si initio medela afferatur, illæque ad

cutim repellantur : quo omisso nec facile deinceps negotium illud succedet, nec reparari poterunt illa læsæ structuræ organicæ vitia; quæ a tali errore orta *Act. physico-med. Acad. N.C Vol. 1. obs. 231.* recensentur.

§. XXVI.

Progredimur ad curationem tussis convulsiuæ tractandam, quæ duabus potissimum indicationibus dirigenda est. Ac primo quidem convenit vehementem illam agitationem & concussionem partium expirationi dicatarum securo modo compescere, & ad moderationem reducere: altera cura sit vt materiam, quæ causam præbet, subtrahamus, si mobilis est: si non mobilis est, & in tumore, scirrho, topho, abscessu, aliisque huius generis, constat, quantum eius fieri potest corrigamus, neque magis inualescat, prohibeamus.

§. XXVII.

Primæ intentioni satisfacere licet, quando materia laryngem, bronchiaque vexat acris, eaque tenuior, quam vt fursum efferri eicique possit, per incrassantia & acrem illum tenuemque humorem inuiscantia. Talia complura in officinis ab antiquo iam prostant, quæ lingendo & lente deglutiendo fructum asserunt aliquem, & si non illum, quem vetustissimi sibi promittebant, fieri posse & solere rati, vt talia ipsam asperam arteriam aliqua ex parte subeant. Pertinet huc potissimum lohoch de papauere recens pamtum, nam vetustate corrumpitur, itemque lohoch de tussilagine, quippe quibus nihil omnino aere inest, cum tota consent ex mucilaginosi: priori etiam sem. papaueris demulcentem blandam virtutem impertitur. Eadem intentione officinas intrarunt diacodion,

codion, GALENO iam vsitatissimum, syrupus de farfara, iuiubinus, de papauere simplex & compositus: quibus per se, linctu vtimur, vel oleo amygdalarum commixtis. Possunt etiam decocto hordei cum C. C. aut auenæ excorticatæ admisceri & cum illis hauriri, aut potiunculis ex aquis destillatis dilui, sicque versus noctem potissimum exhiberi.

§. XXVIII.

Talibus vero solis non permitti curatio debet, vt nec diu continuari eorum vsus cum fructu potest. Illico potius dispiciendum est ex qua caula hic defluxus & decubitus tam acris materiæ spiritus viis accidat. Iam si cognoscatur transpirationem suppressam, in corpore impuris succis scatente, aut exanthemata retrogressa vel retropulsa esse, omni opera mox enitendum est, vt simul ad superficiem hæc reuocemus, simul exhauriamus. Huic scopo efficacissime succurrit æthiops mineralis, siue illum officinalem malis, siue ex antimonio crudo & mercurio paratum: modo in dosi non nimis parci simus, nec ab vsu eius valde cito discedamus.

§. XXIX.

Si nihil horum deprehendatur in culpa esse, malem tamen modo laudato remedio insistere, quam exemplo RIVERII & SYDENHAMI purgantibus acribus, mercurio dulci additis, pugnare. Nam effectus, quem in resol- uenda lymphæ mercurius dulcis purgandi stimulo roboratus facit, in æthiopis vsu non solum blandior sed ipso temporis successu certior est, quam in simultaneis istiusmodi excretionibus: quæ nec semper ex voto cedunt, quum aliquoties exacerbatæ tusses purgantium

usu visæ sint. Quanquam in vniuersum non improbare purgantia aulim, vtique si primarum viarum vitia simul adesse cognoscantur, aut tusses istiusmodi post variolas modo superatas exoriantur: quo casu imprimis conuenire possunt.

§. XXX.

Quod si talibus præmissis motus isti nondum conquiescant, quod aliquando ex sola illa causa fit, quod frigus nocturnum arteriam asperam ad consuetos iam motus identidem exasperat; veniendum est ad paulo fortiora anodyna, vt sunt quæ ipsum opium ingreditur, vt theriaca, mithridatium, pilulæ de cynoglossio, styrace, Wildegansii: quibus tamen singulis præfero tales, in quibus pigro alino generosus equus adiunctus est: hoc est, vbi opii virtus narcotica purgantis non inertis coniunctione temperatur, vt in pilulis Starckeyanis inueni licet; ad quarum imitationem confici possunt haud inferioribus præditæ virtutibus, etiam sine rationis fine præparandi correctoris illius adminiculo.

§. XXXI.

Tandem nec externa insuper habenda sunt, quippe hæc multis casibus vehementiam tussis, admodum conspicuo fructu, minuunt. Exstat in officinis vnguentum pectorale, quod & crocinum ab aliquibus vocatur, quod iis præcipue confert; qui exulceratos pulmones habent, quando tussis nimis ferox redditur. Pleuritide aut peripneumonia correptis, ad tussis & dolorum punctoriorum insigne solatium, imponitur puls ex fegopyro & fl. chamæmeli cocta, cum croeo; linteis duplicatis inclusa toti pectori applicetur.

etiam

etiam fieri potest ex bdellio, myrrha, croco, florum sulphuris modico, hæcque axungia humanæ, terebinthinae ac cerae sufficienti quantitate excepta, linteoque inducta, toti dorso & pectori imponantur; a quo remedio virum pertinacissima tussi, & molestissima, totis noctibus diuexatum insigniter adiutum esse ex prælectionibus Illustris Dom. PRÆSIDIS probe memini.

§. XXXII.

Quin infantibus conuulsoria suffocatiua tussi laborantibus instar incantamenti sæpe profuit, si emplastrum vesicatorium, instar grossi maiusculi, nuchæ impositum fuit: quippe quo pori arte constricti reserantur, & acris materia, quæ partibus membranaceo nervosis incubuit, easque continuo vellicauit, ad superficiem evocata fuit. Præcipue vero conducet hoc remedium, ubi achores, scabies, & alii cutanei affectus exanthematici, male decurrerunt, sui que reliquias, profundius inhærentes, produunt.

§. XXXIII.

Quando aer malignis salino-causticis effluuiis foetus, illas, dum spiritus vias transit, ibi depofuit, simulque cum fistula cibalis superioribus partibus communicauit, illius quidem intuitu multa facienda sunt, quæ hic locus non capit: sed tussis leuandæ causa, atque vt exulcerationibus istis aphthoideis occurratur, iuuat inprimis os & fauces crebro colluere decoctis vinosis, aut simplici vino vel oxymelite: pauperibus acetum, quali familia vitur, sufficit, quod melle simplici, aut rosato, distemperetur. Quod vulgo acetum tantopere reformidetur, ubi tussis adest, noui quidem, sed & miror: quum ve-

tustissimi auctores vel in primis ad defluxiones in gutture, ad anginas & orthopnoëas commendauerint, tam forbendum, quam gargarisandum: & ASCLEPIADES, teste CORN. CELSO, *Lib. IV. cap 4.* illud maximo laudauerit opere. Accedit quod malignarum, quæ tunc maxime iungi solent, febrium sit optima maxima medicina acetum, omnes antidotos alias multis post se parafangis relinquens: quare & hoc intuitu præcipue meretur commendari.

§. XXXIV.

Illis, qui mineralibus vaporibus corrosiuis affatim haustis, & plumbi particulis crebra inspiratione susceptis, malum debent; opus est ante omnia in posterum illa cauere, aut se pinguium vsu præmunire, si ad talem laborem reuertendum est. Vt vero iam allatum corpori suo damnum resarciant, commendatum in primis habeant decoctum raparum exsiccatarum, cum butyro vel oleo amygdalarum dulcium. Aqua dracunculi esculenti, quem LOBELIVS *stirpiam observ. p. 243.* draconem vocat, destillata iusto tempore, istiusmodi tussi laborantes maxime iuuat, vt Ill. Dom. PRÆSES edocet in *Dissert. de metallicol. morbis.* Eadem plantula inter acetaria exhibeatur istiusmodi ægrotis, vt & tussi hypochondriaca laborantibus, plus enim in recessu habet, quam vulgo creditur.

§. XXXV.

Quando peregrina in tracheam illapsa tussim ferociorem excitant, vt omnino periculum suffocationis instet, non inutile est homini sanguinis & succorum pleno venam secare in brachio, sicque detracta aliqua co-

pia

pia humorum respirandi facultatem restituere, quod cum fructu factum vidi & supra retuli. De reliquo non equidem video quid fieri cum fructu tunc queat, & successus expulsiōis a natura & tempore expectandus est. Calculi in ipsis viis spiritus enati pariter naturæ, ut illos expellat, relinquendi videntur. Eam autem adiuuare licebit usu humectantium & lubricantium, quemadmodum AL. TRALLIANVS, loco quem supra indicaui-
mus, rectissime admonet. Interponi poterunt simul talia demulcentia & antispasmodica, quæ efferatos nimium spasmodicos motus mitigent, ut sunt emulsiones ex sem. papaueris & amygdalis paratæ, syrupo papaueris vel diacodio ad gratiam conditæ. E longinquo simul provideatur, ne plures subnascentur calculi, quod in hominibus, qui rheumaticis affectibus obnoxii sunt, aut alias crassos & tartareos humores gerunt, extimescendum est. Quare iuuabit eos si humores si os bene fluxiles reddant, potus præcipue tenuis & copiosi adminiculo, fontiumque mineralium, præsertim Selterani cum lacte potandi, opem experiantur. Seri etiam lactis, herbarum antiscorbuticarum temperatiorum, & has inter præcipue illius modo laudati dracunculi esculenti succis alterati usum frequentem habeant. In tonsillis hærentem calculum vel crebra oris collutione ex decoctis emollientibus & maturantibus a nexu suo liberare oportet, quod IO. LANGIO, supra citato, ex voto cessit, vel provide adhibitorum iustrumentorum ope vtendum est: quemadmodum lapidis talis a balneatore bono cum successu excisi mentio fit in *Eph. A. N. C. Cent. V, obs. 48.*

§. XXXVI.

Misera est conditio eorum, quibus in pulmone abscessus vomicæque hærent, omninoque rari visi sunt, quibus ruptis illis, excussoque multo cum molimine pure, sanitas fuit reddita. Illud certo certius est, quod vehementes tusses istæ omnino nihil emendent, & malum peius reddant, quum numquam consequi vlceris illius, quod toties, tamque violenter concutitur, conuellitur & agitur, consolidatio possit. Quare dum reliqua, quæ vlceri pulmonum debentur, ex arte afferimus, huc etiam respicere omnino oportet, vt motus isti vehementissimi sensim ad mediocritatem reuocentur. Placet in primis balsamus pectoralis MEIBOMII, qui tantillum laudani opiatum in singulas doses continet, cuius usu quotidiano aliquos, qui exulceratos pulmones habuerunt, & a iuuentute habuerunt, ad satis conspicuam ætatem peruenisse nouimus. Possunt etiam, dum paroxysmus defæuit, exterius adhiberi vnguenta, vt pectorale, quod supra laudauimus, itemque resumptiuum, cum aliquantulo populei remixtum: vnde, præter demulcentem effectum, ille etiam consequetur, quem veteres desiderabant, quum magnum & diuturnum motum subituros inungebant, idemque motu iam peracto facitabant. Scilicet lassitudinem talia detrahunt, & subsequi solitam fibrarum rigiditatem emendant.

§. XXXVII.

Quando ventriculus primæque viæ acribus humoribus laborant, in promptu est illos debere obtundi, digeri, tandem euacuari: a quo si non consequimur, quod opere prætium faciat, iusta est suspicio in partibus solidis

dis hærere vitium, vel in glandula dorsali ad œsophagum sita, vel in ipsis duodeni pancreatisque glandulis, vnde primo eliquari per conuenientia resoluentia & aperitiua, deinde euacuari debet. In subsidium externo vsu vocetur empl. saponatum, quod pulcherrime resoluit; dentur mercurialia conuenientia, tandemque interponantur, quæ motus nimis efferatos blande mitigent, neque tamen resolutorio scopo repugnent; qualia superius indicauimus.

§. XXXVIII.

De tussi hypochondriaca quod dicamus vix superest, quod non iam superius dictis comprehensum sit. Numquam illa accidit, quin tamquam accidens alius morbi consideranda sit: vnde directam medicationem nec postulat, nec ex lege therapie rationalis admittit. In tantum autem mederi licet, quantum excessius ille & efferatus motus, a quo nulla directa vtilitas sperari potest, aliis partibus damnum minatur, vt non solum hæmoptysis, herniæ, inque grauidis abortus metui debeant, verum etiam delassatio corporis inutilis, somni-que ablatum beneficium, corporis animalis œconomiæ detrimentum affert. Ad mitigationem conducent tam interna quam externa præsidia, quæ supra laudauimus. Aliquantulum magis ad directam curationem conferunt iris Florentina & scilla: quippe horum simplicium virtus resoluens conspicua est. Sed species di-aires, ob adiectorum farraginem, quorum pars facile rancescit, haud vsquequaque placent. Oxymel scillinum vt & lohoch de scilla, a paruis dosibus incipiendo, cauteque progrediendo, operæ facient pretium, si reliquis,

liquis, principali vitio debitis, prudenter iungantur aut interposita fuerint: quemadmodum eadem etiam in ipsa pectorali difficillima tussi, mucum tenacem resolvendo & ad euacuationem præparando, non sine causa commendata sunt.

§. XXXIX.

In omni tussi bonum est frigus vitare, & corpus ad transpirationis placidum successum bene habere dispositum. Quare infusa theiformia in primis commendanda sunt, quæ pro individuali conditione subiecti ægrotantis concinnanda sunt. Alium etiam recte respondere oportet, quæ, si lenta sit, clysteribus mere emollientibus, multum carminatiuorum oleorum habentibus, duci potest: quod quum omnibus, tum vero præcipue hypochondriacis, bene facit, stricturisque illis, quæ plexibus mæfenterii, aliisque abdominalibus, inhærent, sublatis, tranquillitatem optatam ægrotis, aut saltem sensibilem, qua sæpe contentos esse oportet, quando malum radicitus excindi nequit, affert,

§. XL.

In tussi epidemia maligna cum febre & crebris vomendi conatibus, quibus bilis porracea instar sæcum cerevisiæ spumida euacuabatur, (quæ clō lo cc xxviii. grassabatur) eadem enemata præcipuum fructum attulerunt, satisque diuturna interquiescendi & vires colligendi spacia procurarunt: qui vero naturam, vti rebantur, sequendi & iuvandi spe vomitorias medicinas accipiebant, infausi conatus pœnitentia mox ducebantur, neque pauci horum ad plures abibant, illi utique, qui præ ceteris robusti & humorum pleni erant. Ex-

tra hunc casum in simplici tussi stomachica infantum & puerorum conuulsua, cathartico blandiori, v. g. mannæ solutioni cum pauxillo pulueris radiceis gialappæ, addi potest syrup. fl. persicorum, aut pulu. rad. ipecacuanhæ, vt, sursum peracta vna vel altera euacuatione, potissima tamen operatio per aluum fiat.

§. XLI.

SYDENHAMVS compluribus locis, vbi de curatione tussis conuulsuæ loquitur, vix aliud suadet remedium, quam venæ sectionem, & deinceps cathartica. Quin nec infantilem ætatem ab hac sanguinaria lege excipit, quam ipsa natura venisecibus subtrahere vasorum insigni tenuitate & teneritudine videtur voluisse. Sed relinquimus Angliæ medicis suam siue experientiam siue persuasionem: id scimus quod illi, qui in Germania nostra eundem morem inuehere annisi sunt, nihil præstiterint, quod ceteros inuidere eorum successibus, & æmulari artificium impulerit. Neque tamen in vniuersum repudiamus hoc euacuandi genus, quod tussientis conditio sæpe exposcit, etsi tussis per se minime postulat.

§. XLII.

Putamus autem venam secandam esse effera tussi laborantibus illis, qui semel aut sæpius sanguinem e pulmonibus aut ventriculo eiecerunt; deinde feminis mensium suppressione laborantibus, aut grauidis, tum omnibus huic artificiali euacuationi adsuetis, si tempus consuetum vel instet, vel præsens sit: nouissime illis, qui ex subito in tracheam immisiss siue duris siue fluidis adeo feroci tussi vexantur, vt suffocationis metus

ad sit maxime iustus. Nam quum non desint exempla eorum, qui ex tam friuola causa vitam suam amiserunt; nec rarum sit iisdem casibus aliquos succumbere, ex quibus alii facile eluctantur: melius videtur in talibus ægrotis facere, quod aliqua veri similitudine opem aliquam ferre potest, quam certo interitui ipsos permittere. Qui extra hos casus sanguinem mittunt, incurrunt censuram MVSITANI: *peccat pituita & sanguinem exhauriunt: vnus peccat & alter plectitur.*

§. XLIII.

Nuper perlegenti mihi libellum de fonte soterio Heilsbronnenli hoc anno editum, complures observationes obuenerunt, de insigni fructu, quem aquæ illæ diuturnis & pertinacibus tussibus percurandis attulerunt. Has inter præcipue attentionem illa meretur quæ pag. 75. §. 74. occurrit, de femina quadraginta & octo annorum, quæ inde a tribus annis pectoris multa incommoda perpeffa, noctes fere insomnes, ob tussis ferociam. transigebat, vt omne fere tempus, ni suffocari vellet, sedendo deberet transigere. Sæpe magna coagulati sanguinis frustra, laboriosissimis conatibus, e thorace eiecerat. Aderat iam magnus calor febrilis, & sudores colliquatiui accedebant. Hanc tamen feminam ita iuuerunt aquæ illæ, quum mane ac vesperi illas ad libram dimidiam bibisset, vt omnino hinc conualuerit, & omnis incommodi expers nunc degat.

§. XLIV.

Quum vero inuenirem illum fontem, præter purissimum aquæ elementum, vix aliquid minerale, quod notatu dignum sit, fouere: visum mihi fuit hoc etiam
exem-

exemplum confirmare illam thesin, quam Ill. Dom. PRÆSES singulari dissertatione confirmauit, quod aqua scilicet sit medicina vniuersalis. Incidit simul memoriæ, de quo apud ALEXANDR. TRALLIANVM, ipso capite de tussi, legi, Iacobus Psynchrestus, quem virum magnificum & Dei in arte obseruantissimum vocat: quemque Psynchresti nomen accepisse dicit, *quod alimento humectante potissimum vteretur: atque hoc facere videbatur, cum vulgus hominum rerum ad se non pertinentium curiosum esse, pecuniæ deditum, & semper in tristitia & curis per totam ipsorum vitam agere videret.* Visum autem mihi fuit multos etiam nostratium a difficilibus morbis, & hos inter a tussi graui hypochondriaca, & pectoris variis affectibus, curari posse, si aquæ purissimæ potu pro diætâ vterentur; eos vero tanto maiorem fructum esse consequuturos, qui cereuisiarum crassiorum & vinorum, quin sublimatorum liquorum, frequenti vlu morbis diuturnis firmamentum inde a multis annis posuerunt.

F I N I S.

NOBILI AC PRÆCLARE DOCTO
DNO. CANDIDATO
PRÆSES.

D*Issertationi Tuxæ, Clar. Candidate, inaugu-
rali de convulsiva tussi, quæ magno stu-
dio elaborata, nec quidquam adiiciendum
putavi, præterquam illud, quod perdo-
cta huius thematis tractatio evolutioni in futurum
suscipienda accuratiori luis istius rheumaticæ tussicu-
losæ, quæ usque eo per universam fere Germaniam
nulli hominum parcens immaniter grassata est, pluri-
mum lucis atque utilitatis asferre possit. Epidemius
hic morbus, multiformibus, pro diversa corporum con-
stitutione, stipatus symptomatibus ab initio demum
mensis Novembris natales suos habuit, neque vix
aliam originem ac causam, quam nebulas perniciales,
Et male olentes, eo tempore copiose cadentes, agnoscit:
quæ*

quæ intus hausta ac suscepta tantas in humoribus & motibus vitalibus turbationes concitarunt. Nullius fere anni meminimus quam præsentis, in quo tam subitas & insolitas aeris mutationes in extreme calidum & frigidum, ac vicissim, experti sumus. Quæ variæ & virulenti indolis seminia in corpus humanum subinde invehunt atque adeo tam atrociter hoc anno grassantium & variolarum & morbillorum causam præbuerunt. Quin imo, quæ nostra est sententia, extraordinariæ illæ & præternaturales cœli mutationes ac tempestates in ipso fluido illo catholico aëro-athereo novas subinde materias deleterias morbosas, valde activæ indolis, ingenerant; non secus ac in chymicis, per varias particularum combinationes & mixtiones, variæ & venenata salino-causticæ & etiam salutari indolis producta sistere possumus. Atque adeo a veritatis tramite is minime deflectere mihi videtur, qui tam diversarum epidemice affligentium morborum originem inde ducere ac derivare annititur. Hæc tantum modo sunt, Nobilissime Candidæ, quæ eruditissimo Tuo labori adhuc adjicere placuit. Nihil jam amplius superest, quam ut de egregia indole, modestia, pietate, candore & multis virtutibus stipata, atque etiam de insignissimis in rebus physicis & medicis progressibus & profectibus

ex

ex animo gratuler. Tu, Nobilissime Candidate, ingenti studio atque ardore discendi concitatus, ea, quæ ad rem medicam proxime pertinent, omnibus obscuris abdicatis & rejectis feliciter comprehendisti, emendatæ & purioris doctrinæ medicæ fundamentis, quæ in simplicissimis naturæ motuum legibus & effectis sita sunt, innutritus. Quare nil dubii est, quin, divina gratia ulterius assistente, & exercitatione in nostra arte crebriori accedente, & parentes & patria & miseri ægrotantes a Tuis laudatissimis studiis & conatibus insignem fructum atque salutem possint repetere. Quæ ut omnia prospere & feliciter in Tuum commodum eveniant, est quod ex animo voveo ac comprecor. Vale. Dab. ex museo. Halæ. VIImo. Id Decembr.

Anno M D CC XXXII.

